

隨園詩話

詩話卷四

倉山居士著

凡作詩者各有身分亦各有心胸畢秋帆中丞家漪香夫人有青門柳枝詞云留得六宮眉黛好高樓付與曉妝人是閨閣語中丞和云莫向離亭爭折取濃陰留覆往來人是大臣語嚴冬友侍讀和云五里東風三里雪一齊排着等離人是詞客語夫人又有句云天涯半是傷春客飄泊煩他青眼看亦有慈雲護物之意張少儀觀察和云不須看到婆娑日已覺傷心似漢南則的是名場舊語矣

憚南田壽平之父遜菴遭國變父子相失壽平賣杭州  
富商某爲奴其故人諦暉和尚在靈隱坐方丈苦無救  
策會二月十九日觀音生辰天竺燒香者過靈隱寺必  
拜方丈諦暉道行高貴官男女來膜拜者以萬數從無  
答禮富商夫人從蒼頭婢僕數十人來拜諦暉諦暉探  
知願而織者憚氏兒也矍然起跪兒前膜拜不止曰罪  
過罪過夫人驚問故曰此地藏王菩薩也托生人間訪  
人善惡夫人奴畜之無禮已甚聞又鞭撲之從此罪孽  
深重奈何夫人惶急歸告某商次早某商來長跪不起  
求開一綫佛門之路諦暉曰非特公有罪僧亦有罪地

藏王來寺而僧不知迎僧罪大矣請以香花清水供養  
地藏王入寺緩緩爲公夫婦懺悔并爲僧白已懺悔某  
商大喜布施百萬以見付諦暉諦暉教之讀書學畫一  
時聲名大起壽平佳句如蟬移無定響星過有餘光送  
迎人自老新舊歲無痕只爲花陰貪坐久不須歸去更  
熏衣皆清絕也十四夜望月云平開畫簾舍于嶺盡掃  
星河占一天真乃自喻其筆墨之高矣其時石揆僧與  
諦暉齊名石揆有弟子沈近思後官總憲人問諦暉孰  
優曰近思講理學不出周程張朱範圍壽平作畫能脫  
文沈唐仇窠曰似憚優矣

詩用經書成語有對仗極妙者前輩盧玉岩云頭既責  
余余責頭腹亦負公公有腹近人吳文溥云人非磨墨  
墨磨人我自註經經註我姚念慈云野無青草霜飛後  
菊有黃花雁到初汪韓門云白鳥化後成衰老黃雀飛  
來謝少年胡稚威云春水綠波芳草色雜花生樹亂鶯  
飛朱鹿田得子云我求壯艾三年藥汝似王瓜五月生  
皆用經書樂府成語也余戲集樂府云背蟄天猶子星  
厯厯東升日影雞黃團團

題古蹟能翻陳出新最妙河南邯鄲壁上或題云四十  
年中公與侯雖然是夢也風流我今落魄邯鄲道要替

先生借枕頭巖子陵釣臺或題云一着羊裘便有心虛  
名傳誦到如今當時若着蓑衣去烟水茫茫何處尋

凡事不能無弊學詩亦然學漢魏文選者其弊常流于  
假學李杜韓蘇者其弊常失于粗學王孟韋柳者其弊  
常流于弱學元白放翁者其弊常失于淺學溫李冬郎  
者其弊常失于纖人能吸諸家之精華而吐其糟粕則  
諸弊盡捐大槩杜韓以學力勝學之刻鵠不成猶類鶩  
也太白東坡以天分勝學之畫虎不成反類狗也佛云  
學我者死無愧之聰明而學佛自然死矣

昔人稱謝太傅功高百辟心在一邱范希文經畧西邊

猶戀戀于曩日之圭峯月下與友人書時時及之秋帆  
尚書巡撫陝西有小方壺憶梅詩節其大槩云仙人家  
住梅花村寒香萬頃塞我門門巷寂寂空谷冷艷繁  
枝環破屋塵緣未了出山去回頭別花花不語北走燕  
雲西入秦問梅精舍知何處歲云暮矣風雲驟驛使音  
稀斷隴首天涯人遠乍黃昏料得花還如我瘦松林翠  
羽最相思夢繞南枝更北枝花神曩日盟言在重訂還  
山在幾時香落琴絃彈一曲爾音于里同金玉花如不  
諒余精誠請問鄧尉山樵徐友竹徐名堅蘇州木瀆人  
能詩工畫余舊交也張文敏公題橫山西廬云壺中長

自靜中緣我亦曾經在四年不及蒼髯牆外與梅花看  
到菊花天與畢公同有心在一邱之想

尹文端公年七十七而薨薨時滿榻紛披皆詩草也病  
革間 皇上有駕臨之信才畧收拾前一月命諸公子  
作送春詩西席解吉菴賦云也知住已經三月其奈逢  
須隔一年遺愛只留庭樹好餘暉空托架花鮮公甚賞  
之勤筆加圈歿後方知皆識公第四公子樹齊爲尚書  
應第三句又一聯云千紅萬紫費安排底事功成鶴便  
回亦暗藏騎箕之意皆無心偶觸云

副憲趙學齋先生提倡後學愛才如命掌教萬松書院



識拔英俊少年一時遂有北史張雕武之謗不數年所  
識拔者雲蒸霞起如吳雲岩葉登南輦皆作狀元詞翰  
浮言始息有項春臺秀才早卒先生哭之云文章靈氣  
歸何處師弟情緣結再生余在京師送王卿華歸里云  
風懷似我能憐我客路逢君又別君先生讀之謂卿華  
曰此種才人當鑄黃金事之先生諱大鯨

蔣南莊守潁州有句云人原是俗非因吏仕豈能優且  
讀書謙而蘊藉過瀧喉云亂石磨舟泉有骨雙桹揆霧  
水生塵與徐鳳木布衣水淺攔舟沙怒語山彎轉舵月  
回眸相似蔣名熊常州人

湯潛菴巡撫江蘇出郭云按部雨餘香稻熟課農花發  
曉雲輕人言公理學名儒何詩之清婉也余記座師孫  
文定公亦有咏梅云天地心從數點見河山春借一枝  
回詩不腐而言外俱含道氣

朱子立中丞高韻長髯多權謀人稱雙料曹操與西林  
相公共事雲南彼此抵牾朱有句云畏暑鋪長簟思風  
去短屏頗閒雅不類其爲人康熙間施潛卽諱世綸者  
亦剛不可犯有句云愛山移舫對隔水問花多與中丞  
同調朱名綱

己未冬余隨假歸娶路過揚州轉運使徐梅麓先生止

而觴之席無雜賓汪度齡應銓唐赤子建中皆翰林前輩余科最晚年最少終席敬慎威儀不敢發一語但見壁上有赤子先生端午竹枝云無端鐃鼓出空舟賺得珠簾盡上鈎小玉低言嬌女避郎君倚扇在船頭

湖南張少廷尉名璨字豈石紫髯偉貌議論風生能赤手捕盜與魯觀察亮儕俱權奇自喜題所居云南軒北牖又東扉取次園林待我歸當路莫栽荆棘草他年免挂子孫衣言可風世又戲題云書畫琴棋詩酒花當年件件不離他而今七事都更變柴米油鹽醬醋茶殊解頤也又謂人云見鬼莫怕但與之打人問打敗奈何曰

我打敗才同他一樣

馮占浦在西林相公席上咏牡丹云詩到清平能動主  
花雖富貴不驕人西林喜贈遺甚厚此詩若在他席  
上作便覺無謂

丙辰余在都中受知于張鷟洲先生先生作御史立朝  
侃侃頗著風績有柳魚集行世余購得被人攫去時爲  
憫悶甲午歲余泊舟丹陽旁有小舟相並時天暑彼此  
窻開余艙中詩稿堆積几上隣舟一女子容貌莊姝每  
伺余出艙便注目偷視若領解者余心疑之問其家人  
乃先生女嫁汪文端公從子某因招汪入艙話舊問先

生詩不能記入問夫人夫人乃誦其巡臺灣作云少寒  
多暖不霜天木葉長青花久妍真个四時皆是夏荷花  
度臘菊迎年

宛平黃崑圃先生康熙辛未詞林予告後在長安主持  
風雅人有一技一長必爲掄揚無須識面李方伯渭來  
江南余往衙參一見便云崑圃先生交好耶余曰未也  
方伯云我出都時黃公以足下再三托我方知先生憐  
才有古人風庚午重赴鹿鳴詩曰蕊榜新開敞盛筵漫  
勞車馬問衰年雀羅門巷羣相訝鶴髮重聯桂籍仙  
未重赴瓊林詩曰天鼓聲喧曉漏餘春風吹雨灑庭除

婆婆老眼看新榜  
髮歸青雲接敝廬  
鶴返故巢無宿侶  
花開仙洞見新枝  
輜軒南國追疇昔  
風雨橋山愴夢思  
先生巡撫浙江追感  
兩朝恩遇故詩中及之

姜白石云人所易言我寡言之人所難言我易言之詩  
便不俗

古人詩有全篇用仄聲者天隨子夏日詩四十字皆平  
聲有全篇用仄聲者梅聖俞酌酒與婦飲一篇皆仄聲  
有通首不用韻者古采蓮曲是也有平仄各押韻者唐  
未章碣以八句詩平仄各有一韻是也詩家變體米鍾  
菊莊詩人玉屑言之最詳

稅關巡攔書吏如捕役緝賊虎視耽耽但一見書冊輿  
便索然姚雲上作七古前四句云劬勞王事前旌驅伊  
唔星夜關山踰筭束牛腰橐負載關吏疾呼書書者此  
輩聲口宛然讀之欲笑南豐謝鳴篁有句云近海風濤  
壯當關僕隸尊或和云客久囊雖破船裝書便尊

鄭所南井中心史雖用鐵匣浸水中然年厯二百紙墨  
斷無不壞之理所載元世祖剖割女天祥食其心肺又  
好食孕婦腹中小兒語太荒悖殊不足信惟四言詩一  
首殊妙曰今日之今霍霍栩栩少焉矚之已化爲古

女心外向自古爲然南越古蠻洞秦時最强俗尤善弩

每發鉏箭貫十餘人趙佗畏之蠻王有女蘭珠美而豔  
製弩尤精佗乃遣子某贅其家不三年盡得其製弩破  
弩之法遂起兵伐之虜蠻王以歸此事見粵嶠志余賦  
詩云趙王父子開邊界賴種蘭珠一朵花銅弩三千墮  
墮去女兒心太爲夫家按後世開邊往往收功于婦人  
洪武時貴州宣慰使雷翠妻奢香爲都督馬聘所裸撻  
乃走懇京師太祖問朕爲汝報仇何以報我曰願立龍  
場九驛通黔蜀之道後果如其言吳明卿詩云君不見  
蜀道之闊五丁神犍爲萬卒迷無津帳中坐叱山河走  
誰道奢香一婦人



古來奇女子如馮婕及洗夫人事載史書惜見于詩者  
絕少惟石柱土司之秦良玉能爲國殺賊明懷宗賜詩  
云桃花馬上請長纓又云試看他年麟閣上丹青先畫  
美人圖 本朝朱鹿田先生作七古美之警句云一時  
巾幗盡鬚眉馬上紅旗馬前酒蜀亡不肯樹降旗殘疆  
猶爲君王守又曰綠沉槍舞春星轉花桶裙拖錦帶紅  
僧無稱郎之理而北魏諺云支郎眼中黃形軀似智囊  
是僧可稱郎之一証魏有三高僧支謙諒支識也  
香山詩楊柳小蠻腰妓名也後寄禹錫詩携將小蠻去  
招得老劉來自註云小蠻酒榼也小蠻竟有三解

汪舒懷先生云錢箋杜詩穿鑿附會令人欲嘔如以黃  
河十月水爲橫蓋之水煎弦續膠爲美饌愈疾以洗兵  
馬收兩京一篇爲刺肅宗比之商臣楊廣此豈少陵忠  
君愛國之心耶尤可笑者跋元人汪水雲詩客中忽忽  
又重陽滿酌葡萄桃當菊觴謝后已叨新聖旨謝家田土  
免輸糧第二筵開八九重君王把酒勸三官醅酥割罷  
行酥酪又進椒盤剝嫩葱就此二首遂以爲謝后有失  
節之事按宋史理宗謝后寶慶三年冊立垂四十年而  
度宗嗣位尊爲太皇太后已老病不能聽政德祐二年  
宋亡徙越七年而崩壽七十四是至燕時已六十七矣

寧有劉曜羊后之慮哉水雲又咏宋宮人分嫁北匠云  
君王不重色安肯留金闥則世祖爲人可知元史又稱  
宏吉刺皇后見幼主入朝而不樂爲全太后不習水上  
代奏乞放還江南帝雖不許而封幼主爲瀛國公則別  
置邸第完全眷屬可知水雲詩云昭儀別館香雲煖手  
把詩書授國公是王昭儀亦未入元宮也

陳后山吟詩最刻苦九日云人事自生今日意寒花只  
作去年香鄭毅夫云夜來過嶺忽聞雨今日滿溪都是  
花此種句似易實難人能知易中之難可與言詩

雍正甲寅海寧陳文簡公予告在家來游西湖人知三

朝元老觀者如堵余年十九猶及仰瞻風采先生仙風  
道骨年已八十猶替人題陳章侯蓮鷺圖云墨花吹得  
綠差差小景分來太液池白鷺不飛蓮不謝搖風立雨  
已多時書法絕似董香光余生平所見翰林前輩如徐  
蝶園相國陳文簡公黃崑圃中丞熊滌齋太史皆曾靈  
光也

諺云讀書是前世事余幼時家中無書借得文選見長  
門賦一篇恍如讀過離騷亦然方知諺語之非誣毛俟  
園廣文有句云名須沒世稱才好書到今生讀已遲

凡作人貴直而作詩文貴曲孔子曰情欲信詞欲巧孟

子曰智譬則巧聖譬則力巧卽曲之謂也崔念陵詩云  
有磨皆好事無曲不文星洵知言哉

或問詩如何而後可謂之曲余曰古詩之曲者不勝數  
矣卽如近人王仔園訪友云亂鳥棲定夜三更樓上銀  
燈一點明記得到門還扣花陰悄聽讀書聲此曲也  
若到門便扣則直矣方蒙章訪友云輕舟一路繞烟霞  
更愛山前滿澗花不爲尋君也留住那知花裡卽君家  
此曲也若知是君家便直矣宋人咏梅云綠楊解語應  
相笑漏洩春光恰是誰咏紅梅云牧童睡起朦朧眼錯  
認桃林欲放牛咏梅而想到楊柳之心牧童之眼此曲

也若專咏梅花便直矣

詩雖貴淡雅亦不可有鄉野氣何也古之應劉鮑謝李杜韓蘇皆有官職非村野之人蓋士君子讀破萬卷又必須登廟堂覽山川結交海內名流然後氣局見解自然闊大良友琢磨自然精進否則鳥啼蟲吟沾沾自喜雖有佳處而邊幅固已狹矣人有鄉黨自好之士詩亦有鄉黨自好之詩桓寬鹽鐵論曰鄙儒不如都士信矣吾鄉朱笏田明府女名右妍能詩有殘溜積來頻洗硯爐灰撥去屢添香之句嫁壻徐金粟亦少年能詩七夕云一灣河漢影萬國女兒情晚坐云風帶殘雲歸遠岫

樹搖餘滴亂斜陽

丙辰以布衣薦鴻詞者海內四人一江西趙寧靜一河南車文一陝西屈復一嘉禾張庚車之著作余未經見張善畫長于五古人亦樸誠獨屈叟傲岸自號悔翁出必高杖四童扶持在京師見客南而坐公侯學詩者入拜床下專改削少陵訾詆太白以自誇身分耳食者抵死奉若神明山左顏懋倫心不平獨往求見坐定卽問曰足下詩有書中乾蝴蝶二十首此委巷小家子題目李杜集中可會有否屈默然慚人以爲快沈歸愚刻別裁集僅錄屈王母廟一首云秦地山河留落日漢家宮

闕見孤燈如今應是蟠桃熟寂寞何人薦茂陵

慶兩峯王觀察蕪湖因舊署荒蕪前任劉公未加修葺  
兩峯抵任爲培花樹戲題一絕寄劉云笑殺河陽舊吏  
來地無青草長莓苔嶺梅岩桂江干竹都是劉郎去後栽  
辛未 聖駕南巡西湖僧某迎於聖因寺 上以手  
撫其左腕其僧遂綉團龍於袈裟之左偏客來相揖者  
以右手答之而左臂不動杭葦浦嘲之云維摩經院境  
清嘉依舊紅塵送歲華夸道賜衣曾借紫竹邊留客晒  
袈裟

丙辰徵士王藻字載揚吳江人販米爲業偶題桃源圖



云相看何物同塵世只有秦時月在天以此受知于沈  
翰翁先生四處揄揚送棄業讀書吳大宗伯荆山薦舉  
鴻詞科廷試報罷往來揚州與詩人結社吟咏貌瑣瘦  
急遽小聲音好畜朱板書青田石印章有友借觀悞墮  
地碎載揚垂泣三日其風趣如此讀梅村集云百首淋  
浪長慶體一生慚愧義熙民剪梅云大抵端相求人畫  
最難割愛似刪詩

余少時過江西瀘溪舟中把書吟咏岸上兒童指曰此  
學上船也余喜而成句云衣冠僧識江南客翰墨兒呼  
學上舟後三十年讀無錫顧公奎光赴杭州詩云村民

久識瀘溪令笑指蓬窗滿几書兩意相同而俱成于瀘  
溪亦奇顧咏傀儡云閒來惟挂壁用我也登場過沅江  
云名場似奕無同局吏道如詩有別才

陳滄州先生守蘇州重遊虎邱詩云雪艇松龕閱歲時  
廿年踪跡鳥魚知春風再掃生公石落照仍銜短薄祠  
雨後萬松全還匝雲中雙塔半迷離夕佳亭上憑闌處  
紅葉空山繞夢恩塵鞅刪餘半晌閒青鞋布襪也看山  
離宮路出雲霄上法駕春留紫翠間代謝已憐金氣盡  
再來偏笑石頭頑棟花風後遊人歇一任鷗盟數往還  
其時總督噶禮以詩爲誹謗句句旁註而劾奏之摘印

下獄 聖祖詔云詩人諷咏各有寄托豈可有意羅織以入人罪命復其官尋擢霸昌道

杭州趙鈞臺買妾蘇州有李姓女貌佳而足欠裹趙曰似此風姿可惜土重土重者杭州諺語脚大也媒嫗曰李女能詩可以面試趙欲戲之卽以弓鞋命題女卽書云三寸弓鞋自古無觀音大士赤雙趺不知裹足從何起起自人間賤丈夫趙悚然而退

古閩秀能詩者多何至今而杳然全宰江寧時有松江女張氏二人寓居尼菴自言文敏公族也姊名宛玉嫁淮北程家與夫不協私行脫逃山陽令行文關提余點

解時宛王堂上獻詩云五湖深處素馨花誤入淮西估  
客家得遇江州白司馬敢將幽怨訴琵琶余疑倩人作  
女請面試予指庭前枯樹爲題女曰明府旣許婢子吟  
詩詩人無跪禮請假紙筆立吟可乎余許之乃倚几疾  
書曰獨立空庭久朝朝向太陽何人能手植移作後庭  
芳未幾山陽馮令來予門張女事作何辦曰此事不應  
斷離然才女嫁俗商不稱故釋其背逃之罪且放歸矣  
問何以知其才曰渠獻詩云泣請神明宰容奴返故鄉  
他時化蜀鳥銜結到君旁馮故四川人也

雍正間京師伶人劉三色藝冠時獨與翰林李玉洲先

生交好蘇州張少儀觀察爲諸生時封公謫戍軍臺徒步入都爲父贖罪一時有三子之稱蓋云公子才子孝子也沿門托鉢尚缺五百餘金偶于先生席上言及此事劉慨然曰此何難公子有此孝心我能相助遂徧告班中人云諸君助張如助我也擇日設席江南會館請諸豪貴來已乃纏頭而出一座傾靡擲金錢者如雨果得五百餘金盡以與張而封公之難遂解余丙辰入都在先生處見劉則已老矣但聞先生未第時甚貧劉愛其才以身事之余疑而不信偶過雍髮舖壁上無名氏題云欲得劉三一片心明珠十斛萬黃金一錢不費偏

傾倒妬殺江南李翰林方知果實事也先生在吳門與  
朱約岑送采官北上云莫惜當筵舞髻斜多情曾爲損  
才華玉郎此會成長別飛盡江南陌上花朱和之有春  
燈紅照一枝花之句朱爲張匠門先生之故人相見京  
師年已八十惡見髮鬚之白日日薙之與翁齋堂同癖  
乾隆己未京師伶人許雲亭名冠一時羣翰林慕之糾  
金演劇余雖年少而車羸馬無足動許者許流目送  
笑若將暱焉余心疑之未敢問也次日侵晨竟叩門而  
至情款綢繆余喜過望贈詩云笙清簫煖小排當絕代  
飛瓊最擅場底事一泓秋水剪曲終人反顧周郎

李桂官與畢秋帆尚書交好畢未第時李服事最殷病  
則秤藥量水出則授繮隨車畢中庚辰進士李爲購素  
冊界烏絲勸習殿試卷子果大魁天下溧陽相公康熙  
前庚辰進士也重赴櫻桃之宴聞桂耶在坐笑曰我指  
老眼要一見狀元夫人其名重如此戊子年畢公官陝  
西李將往訪路過金陵年已三十風韻猶存余作長歌  
贈之序其勸畢公習字云若教內助論勛伐合使夫人  
讓誥封

今人論詩動言貴厚而賤薄此亦耳食之言不知宜厚  
宜薄惟以妙爲主以兩物論狐貉貴厚鮫鮪貴薄以一

物論刀背貴厚刀鋒貴薄安見厚者定貴薄者定賤耶  
古人之詩少陵似厚太白似薄義山似厚飛卿似薄俱  
爲名家猶之論交謂深人難交不知淺人亦正難交

庚寅元旦 皇上登保和殿受朝賀望見遠處有烟騰

空而起問大學士曰得毋民間有失火者乎首相舒文

襄公奏曰似烟非烟諸公服其吐屬典雅古語似烟非烟是謂慶雲

杭人土音呼朋作蓬之本音崩爲蓬之陽音皆一東韵

也韻書都收入十蒸則與一東遠矣然左傳翹翹車乘

招我以弓豈不欲往畏我友朋三國志張昭作陶謙哀

詞曰喪覆失恃民知困窮會不旬月五郡潰崩是將朋



崩二字俱押人一東也

彭城李涓字蓉涓以選拔入京師一日欲求某友之窘  
賣所乘小騮贈之賦詩云從此蹢躅顛行步好花都讓  
別人看亡何不第而亡人以爲識蓉涓貌美揚州絢舖  
女兒有國色好養鸚鵡每早喂食一日方提籠而目有  
所睇不覺籠落于地旁人咸訝之察所睇則蓉涓方過  
其門故也劉霞裳聞而賦詩云貪看野鴛鴦忘墮手鸚  
鵡可惜此時情鸚鵡不能語

陸陸堂諸襄七汪韓門三太史經學淵深而詩多澁悶  
所謂學人之詩讀之令人不懽或誦諸詩秋草馴龍種

春羅狎雉媒九秋易灑登高淚百戰重經廣武場差爲  
可誦他作不能稱是相傳康熙間京師三前輩主持風  
雅士多趨其門王阮亭多譽汪鈍翁多毀劉公敞持平  
方望溪先生以詩投汪汪斥之次以詩投王王亦不譽  
乃投劉劉笑曰人各有性之所近子以後專作文不作  
詩可也方以故終身不作詩近代深經學而能詩者其  
鄭機尺惠紅豆陳見復三先生乎

吟詩自註出處昔人所無歐公譏元稹註桐柏觀碑言  
之詳矣况詩有待于註便非佳詩韓門先生蚊烟詩十  
二韻註至八行便是蚊類書非蚊詩也贈友云知來匪

鵲休論往爲主如鴻喜得賓上句註淮南子乾鵲知來  
而不知往下句註孔疏鴻以先至者爲王後至者爲賓  
作詩何苦乃爾惟張雪子雲南典試歸將近長安而歿  
先生哭之云路紆雙節重天近一星沉便覺清妙又有  
咏柳絮一絕云沾襟撩袖自矜妍未化爲萍絕可憐嘆  
息春風竟何意團揉無處不成綿

惲南田少時受知王太倉相國有監司某延之作畫不  
卽赴乃追致蘇州拘官廳所明日將辱之南田以急足  
至婁水乞援時已二更相國急命呼舟將出復擊案曰  
馬最速舟不如遽跨馬命僕以竹竿挑燈縛背上行九

十里抵郡城尙未五鼓也守門者知爲相國遽啟門直詣監司署問南田所在攜之以歸監司隨詣太倉謝過乃釋南田畫拙修堂譙集圖題詩云花殘江國滯征纓綠浦紅潮柳岸平芳草有心抽夜雨東風無力轉春晴艱難抱子還鄉國落拓浮家仗友生只爲躊躇千里別歸期臨發又重更

黃莘田妻月鹿夫人與莘田全有研癖先生罷官時囊餘二千金以千金市十研以千金購侍兒金櫻以歸有二女長曰淑窈字姒洲次曰淑婉字紉佩題杏花雙燕圖云艷陽天氣試輕衫媚紫嬌紅正鬪酣記得春明池

館靜落花風裡話呢喃夕陽亭院曲闌東語燕時飛扇  
底風不管春來與春去雙雙長在杏花中金櫻明艷能  
詩許子遜酒間舉共夜來香絕句云知隔絳紗帷暗坐  
謝娘頭上過來風

白雲禪師作偈曰蠅愛尋光紙上鑽不能透處幾多難  
忽然撞着來時路始覺平生被眼瞞雪竇禪師作偈曰  
一兔橫身當古路蒼鷹才見便生擒後來獵犬無靈性  
空向枯椿舊處尋二偈雖禪語頗合作詩之旨

冬友侍讀出都過天津查氏晤佟進士濬言其母趙夫  
人苦節能詩祭竈云再拜東廚司命神聊將清水餞行

塵年年破屋多灰土須怨夫亡子幼人查恂叔言其叔  
心穀悼亡姬詩和者甚衆有佟氏姬人名艷雪者一絕  
甚佳其結句云美人自古如名將不許人間見白頭此  
與宋笠田明府白髮從無到美人之句相似

乙丑歲予宰江寧五月十日天大風白日晦冥城中女  
子韓姓者年十八被風吹至銅井村離城九十里其村  
氓問明姓氏次日送女還家女已婚東城李秀才之子  
李疑風無吹人九十里之理必有姦約控官退婚余曉  
之曰古有風吹女子至六千里者汝知之乎李不信予  
取元郝文忠公陵川集示之曰郝公一代忠臣豈肯作

謠語者第當年風吹吳門女竟嫁宰相恐汝子沒福耳  
秀才讀詩大喜兩家婚配如初制府尹公聞之曰可謂  
宰官必用讀書人矣其詩曰八月十五雙星會花月搖  
光照金翠黑風當筵滅紅燭一朶仙桃落天外梁家有  
子是新郎芊氏負從鍾建背爭看燈下來鬼物雲髻欹  
斜倒冠佩須臾舉目視旁人衣服不同言語異自說吳  
門六千里恍惚不知來此地甘心肯作梁家婦詔起高  
門榜天賜幾年夫壻作相公滿眼兒孫盡朝貴須知仇  
儂有因緣富者莫求貧莫棄

或問明七子摹倣唐人王阮亭亦摹倣唐人何以然愛

阮亭者多愛七子者少余告之曰七子擊鼓鳴鉦專唱  
宮商太調易生人厭阮亭善爲角徵之聲吹竹彈絲易  
入人耳然七子如李崕峒雖無性情尚有氣魄阮亭子  
氣魄性情俱有所短此其所以能取悅中人而不能牢  
籠上智也

近有聲調譜之傳以爲得自阮亭作七古者奉爲秘本  
余覽之不覺失笑夫詩爲天地元音有定而無定到恰  
好處自成音節此中微妙口不能言試觀國風雅頌離  
騷樂府各有聲調無譜可填杜甫王維七古中平仄均  
調竟有如七律者韓文公七字皆平七字皆仄阮亭不



能以四仄三平之例縛之也倘必照曲譜排填則四始六義之風掃地矣此阮亭之七古所以如杞國伯姬不敢那移半步

南朝人云鵝性最傲鶴更甚焉余嘗畜一鶴偶過池隄甚窄鶴故意張翅攔之頗爲所窘後讀陸甥詩云境仄鶴妨人去路窻虛雲攪雨來天方賞其詞之工

詩雖小技然必童而習之入手先從漢魏六朝下至三唐兩宋自然源流各得脈絡分明今之士大夫已竭精神于時文八股矣宦成後慕詩名而強爲之又慕大家之名而挾取之於是所讀者在宋非蘇卽黃在唐非韓

則杜此外付之不觀亦知此四家者豈淺學之人所能  
襲取哉於是專得皮毛自夸高格終身由之而不知其  
道書曰德無常師主善爲師子貢曰夫子焉不學而亦  
何常師之有此作詩之要也陶篁村曰先生之言固然  
然亦視其人之天分耳與詩近者雖中年後可以名家  
與詩遠者雖童而習之無益也磨鐵可以成針磨磚不  
可以成針

余于古人之詩無所不愛恰無偏嗜者于今人之詩亦  
無所不愛恰于高文良公昧和堂集黃莘田先生香草  
齋詩有偏嗜焉豈亦性之所近耶

丙戌年慶樹齋雨林兩公子過蘇州余招飲唐氏棣華  
書屋一時都知錄事佳者雲集三人各有所屬雨林卽  
席云度曲花猶遮半面迎眸春已透三分別後又寄詩  
云天河落向碧窻紗十二瑤臺霧不遮香煖繡幃春似  
海一鴛鴦抱一枝花友人陶夔典贈余一姬載還家方  
知已有娠乃送還之雨林所昵以事到官有困于株木  
之慘雨林和余懊惱詞云無柰別春何詩筒驢背馱花  
開仍散影水小亦生波頓改繁華夢惟餘懊惱歌金釵  
雖十二難解此情多滄浪烟水際無復蕩舟來完璧仍  
歸趙明珠別有胎倚欄頻繾綣對月暗低徊環珮聲偏

遠銷魂又幾回猶記旋亭夜紅燈語不休芙蓉經雨損  
風蝶爲花愁薄命原應爾無情笑此流心同天外月空  
自照蘇州又寄遊仙一首云吹殘瓊樹下蓬萊自斷仙  
緣萬念灰底事無風花也落方知立地有輪迴樹齋公  
子後一年爲威遠將軍出鎮伊犁予寄七律三章末二  
句戲云倘奪胭脂好顏色江南兒女要平分

乙丑余知江寧救火水西門見喧嚷時一美少年着單  
縑衣貌頗開雅異而問焉曰秀才也姓龔名如璋號雲  
若次日以文作贄來往甚歡後十年中進士改名孫枝  
過隨園見贈云早結山堂水竹緣朝簪重脫未華顛有

詩何但稱循吏不老方知是謫仙細雨漸消寒食候穠  
花爭放麴塵天謝公墩外峯峯好屐齒逡巡又一年龔  
後出宰山西榆次縣王師西征烹羊享兵得奇句云  
拔刀割肉目眚裂太平時羊亂時妾

詩得一字之師如紅爐點雪樂不可言余祝尹文端公  
壽云休夸與佛同生旧轉恐恩榮佛尚差公嫌恩字與  
佛不切應改光字咏落花云無言獨自下空山邱浩亭  
云空山是落葉非落花也應改春字送黃宮保巡邊云  
秋色玉門涼蔣心餘云門字不響應改關字贈樂清張  
令云我慙靈運稱山賊劉震裳云稱字不亮應改呼字

凡此類余從諫如流不待其詞之舉也浩亭詩學極深  
惜求得其遺稿

茗生分校禮闈作詩云再然丹炬炤決心恐有遺珠碧  
海沉記得當時含冰石十年辛苦作冤禽朱香南太史  
有句云寄語羣公高着眼青衫明日淚痕多余甲子分  
校亦有句云帶入秋闈示同伴當時落第淚痕衫

桐城女子方筠儀嫁左君文全而寡年二十有六卽守  
節以終有含貞閣集其偶檢先夫遺草云鸚鵡才高屈  
數奇未開篋等淚先垂平生映雪囊螢力不見騰蛟起  
鳳時獄底龍埋光詎掩墓門鶴返事難期九京應悔嘔

心血百卷文章待付誰

春江公子戊午孝廉貌如美婦人而性倜儻與妻不睦  
好與少俊遊或同卧起不知烏之雌雄嘗賦詩云人各  
有性情樹各有枝葉與爲無鹽夫寧作子都妾其父中  
丞公見而怒之公子又賦詩云古聖所制禮立意何深  
妙但有烈女祠而無貞童廟中丞笑曰賤子強詞奪理  
乃至是耶後乙丑入翰林妻楊氏亡矣再娶吳氏貌與  
相抵遂懽愛異常余贈詩云安得唐宮針博士喚來趙  
國繡郎君嘗觀劇于天祿居有叅領某誤認作伶人而  
調之公子笑而避之人爲不平公子曰夫狎我者愛我

也予獨不見晏子春秋諫誅國人章乎惜彼非吾偶耳  
怒之則俗矣叅領聞之踵門謝罪

詩少作則思澁多作則手滑思澁須多看古人之詩  
滑須用刺進幾層之法

蕭子顯自稱凡有著作特寡思功須其自來不以力構  
此卽陸放翁所謂文章本天然妙手偶得之也薛道衡  
登吟榻構思聞人聲則怒陳后山作詩家人爲之逐去  
猶犬豕見都寄別家此卽少陵所謂語不驚人死不休  
也二者不可偏廢蓋詩有從天籟來者有從人巧得者  
不可執一以求



已未殿試子澈諸同年云霓裳三百都輸我此處曾來  
第二回蓋試鴻博曾在保和殿也同徵友蓬雲堦曾與  
章藻功太史蔣文肅相公同時角逐名場而流落不偶  
誓不登科不娶妻寓京師晉陽巷五十餘年而卒康熙  
庚子中北關副車妻年五十竟以處女終余有詩弔之  
云五十四年蕭寺老終身一曲雉朝飛雲堦名駭常熟  
人

雲堦七十生日金江聲觀察率同人攜樽晉陽菴卽席  
賦詩云卅年京洛已成翁經學人推馭子弓酒熟漫將  
孤影勸詩成先揀妙香炷龕燈清晝同彌勒慧業前生

定玉童天眼視君多道氣紛紛真愧可憐蟲

岡東張學林爲京江相公之孫守河南時雲堦薦余司  
記室事公欣然相延余以道遠不果往記其贈蓮云征  
塵才拂卸行滕亟叩禪扉訪舊朋七度春明惟剡爾卅  
年蕭寺竟同僧賣文自昔家懸磐愛士子今局似冰我  
亦栖栖倦行役二毛相對感鬚鬢公暮年陞觀察閩河  
工憊甚有女六歲泣曰爺何不歸家婢戲云作官豈不  
好耶女答曰大家原好爺一箇獨苦耳公凄然泣下賦  
詩云恩重難抽七尺身愧他黃口語酸辛

康熙中年金陵詩人有三布衣一馬秋田一袁古香一

丙瀛客古香年老在都中館康親王府丙年少後至意頗輕之常短袁于王前一日王命宦者封一紙出付客題是賀人新婚韵限階乖骸埋四字外銀二封一重一輕能作此詩者取重封留邸不能者持輕封作路費歸丙辭不能而袁獨咏云裴航得踐遊仙約簇擁紅燈上綠階此夕雙星成好會百年偕老莫相乖芝蘭氣吐香爲骨冰雪心清玉作骸更喜來宵明月滿團圓不爲白雲埋王大欣賞丙慚阻卽日辭歸馬客中有句云三更聞雁月在水半夜打鐘天有霜

宋王禹偁咏月波樓自註不知月波出處按漢樂府月

穆穆以金波昌黎詩微風吹空月舒波已用之矣

松江張夢喈之妻汪氏名佛珍能詩而有幹才夢喈外出有偷兒入其室汪佯爲不知喈曰今夕賴得某在家相護可無憂矣某者其戚中之有勇力者也偷兒聞之潛逃夫人佳句如對月云萬戶恍臨城不夜千年惟有免長生對雪云自攜尊酒酬滕六莫損籬邊竹外枝兩子興載興鏞皆能詩來江寧秋試興載見贈云海內論交皆後輩江南何福着先生興鏞見贈云絕地通天雙管擅登山臨水一筇先人夸其妙不知皆母訓也興載云桐鄉有程拱字者畫拜袁揖趙哭蔣齒其人非隨園

心餘雲松三人之詩不讀想亦唐時之任華荊州之葛清耶程字墨浦廩膳生

李敏達公撫浙時威不可犯獨能敬讀書人設志局修書所延皆一時名士公餘之暇放艇西湖屢開文讌汪西顥沆賦詩云西湖大好作春遊環珮如雲簇水頭誰似尚書能愛士日斜堤外未回舟其時余才九歲後五十年西顥在莊相國席上見贈云花卮同泛小山堂回首星霜三載強野叟尚能夸舊政羣公每見譽文章君卿老去言逾妙陶令歸來樂未央莫道隨園秋色淡萱庭日月閉門長與余在席上論元次山文有惡圓一篇

余道天體尚圓何可見惡西顛因指身上衣袖冠領席上盤碗壺碟曰諸物皆圓才適于用彼此大笑

詩文用字有意同而字面整碎不同死活不同者不可不知楊文公撰宋主與契丹書有隣壤交懽四字真宗用筆旁抹批云鼠壤糞壤楊公改隣壤爲隣境真宗乃悅此改碎爲整也范文正公作子陵祠堂記初云先生之德山高水長旋改德字爲風字此改死爲活也荀子曰文而不采樂記曰聲成文謂之音今之詩流知之者鮮矣

昔人有王琨回面避家姬之句隄其迂也元相燕帖本

兒侍妾數百一日宴侍郎趙世延家見簾內人驚爲絕  
色竄取至家卽其第二十九房妾也虞啟蜀秀才題其  
事云一簾相隔未模糊上眼心驚卽故夫絕似采桑相  
遇處大元宰相作秋胡

唐書載賀知章在禮部選輓郎取捨不公門蔭子弟喧  
鬧盈門知章不敢出乃于後園昇一梯出頭牆外以決  
事康熙辛丑會試李穆堂先生用通榜法所取皆一時  
宰士落第者糾衆作鬧新進士無由入謁或呈一詩云  
門生未必敢升堂道路紛紛鬧未央我獻一梯兼一策  
墻頭高立賀知章丙辰予在都中見先生白鬚偉貌有

泰山巖巖氣象待後輩當面必訓斥逢人必贊揚人以  
故畏而服之余謂此張乖厓待彭公乘法也前輩率真  
亦可不必

周青原云不知誰把芙蓉摘枝上分明見爪痕劉悔菴  
云鏡影不知雙髻白書聲寧識此翁衰余謂不知得妙  
王至淳云水邊紅影一燈過知有人從堤上行楊子載  
云忽驚雨後青龍爪知是蒼松倒挂枝余謂知得妙喬  
慕韓云夢回枕上牕微白知是天明是月明余謂似知  
非知得妙

宜興儲氏多古文經義之學少吟詩者吾近吟得二人



焉一名潤書字玉琴贈梅岑云一曲吳歌酒半醺當筵  
爭識杜司勳天花作骨絲難繡春水如情剪不分話到  
西窗剛近月人於東野願爲雲應知此後相思處日日  
江頭倚夕驢又句云山氣作寒啼鳥外春陰如夢落花  
初

其一名國鈞字長源梁溪云紙鷺輕颺午晴開雜沓遊  
人傍水隈多半畫船猶未攏知從池上餽魚來卽目云  
日午橫塘緩櫂過風吹花氣蕩層波依篷不肯輕回首  
近水樓臺茜袖多晚年飄泊六十自壽云誰言老去離  
家慣轉恐歸來卒歲難窘狀可想他如樹涼宜散帙梅

盤如瓦木州消松翠淡雪墮柳枝輕  
灑旗翻涼雪土鏹燦在衣嵐翠忽從亭午  
變扇統都向嫩晴開銀筵度曲徐牽舫  
鏡檻懸燈不隔紗皆詩人之詩歿後知之者少矣

余宰江寧時查宣門居士開贈蔗塘詩一集蓋其族人

心穀先生爲仁所作本籍海寧寓居天津十九歲卽經

患難在獄八年始得釋歸憐才愛士置驛通賓其詩清

妙蓋深得初白老人之教者同友集空谷園云郊居

壩少幽訪共沿回柳下孤篷泊花間白版開高人還掩

臥稚子識曾來小立窺鷗鷺忘機客不猜秋夜病中云

老尾迢迢報析聲虛堂如水斷人行雲移一朵月吞吐  
竹嘯幾聲風送迎不向枚生求七發祇憑麴部覓三清  
調糜煮藥經旬臥白髮蕭蕭又幾莖他如酒無千日醉  
事有百年忙風愁撼樹響鼠厭數錢聲爲問亭邊三五  
樹春來花發幾多枝皆可誦也已未余乞假歸娶杭莖  
蒲前輩爲余通書先生命其子儉堂禮登船厚儘至今  
未敢忘也

先生有蓮塘詩話載初白老人教作詩法云詩之厚在  
意不在辭詩之雄在氣不在句詩之靈在空不在巧詩  
之淡在妙不在淺其言頗與吾意相合特錄之

隨園詩話卷五

倉山居士著

余春圃香亭兩弟詩皆絕妙而一累于官一累于畫皆  
未盡其才春圃有揚州虹橋二律云出郭聊爲汗漫遊  
虹橋曉放木蘭舟菱荷香氣宜初日鷗鷺情懷赴早秋  
自喜琴尊今雨共敢夸風雅昔賢儔盈盈綠水依依柳  
暫擬名園作小留雁落平沙古調稀冰絃聲徹樹間扉  
荷亭追暑茶烟颺竹院尋僧木葉飛山雨暗移游客舫  
水風涼上酒人衣林鴉樾馬都喧散賓從傳阿子夜歸  
又山堂勝迹先賢重蓮界慈雲大士尊皆佳句也

戊辰秋余初得隋織造園改爲隨園王孟亭太守商寶  
意陶西圃二太史置酒相賀各有詩見贈西圃云荒園  
得主名仍舊平野添樓樹盡環作吏如何耽此事買山  
真不乞人錢寶意云過江不愧真名士退院其如未老  
僧領取十年卿相後幅巾野服始相應蓋其時余年才  
過三十故也惟孟亭詩未錄只記萬木槎枒綠到簷一  
句而已嗟乎余得隨園之次年卽乞病居之四十年來  
園之增榮飾觀迥非從前光景而三人者亦多化去入  
矣

西林鄂公爲江蘇布政使刻南邦黎獻集沈歸愚尚書

時爲秀才得與其選後此本進呈 御覽沈之受知從  
此始也公春風亭會文贈華豫原一律中四句云謬以  
通家尊世講敢當老友列門生文章報國科名重洙泗  
尋源管樂輕其好賢禮士情見乎詞公亡後門下生楊  
潮觀梓其詩五百餘首苦熱云未能作霖雨何敢怨驕  
陽偶成云楊柳情多因帶水芭蕉心定不聞雷題某寺  
云飛雲倚岫心常住明月沉潭影不流別貴州云身名  
到底都塵土留與閒人袖手看鳴呼公出將入相垂二  
十年經畧七省諸郎君兩督兩撫故吏門生亦多顯貴  
而平生詩集終傳于一落托書生檀默齋詩云不有三

千門下客至今誰識信陵君

揚州孝廉馬力畚自負古文作家與汪可舟會于虛轉  
運席上汪雖布衣詩才實出馬上馬意頗輕之汪又不  
肯自下於是二人終席不交一語後五日馬病卒沙斗  
初戲可舟曰汝與馬君前日席間已陰陽分界矣汪送  
方守齋之白下兼懷隨園云此邦賴有舊神君除却斯  
人孰與羣久卧林泉猶未老只談風月別無聞山中白  
石同誰煮座上名香待爾焚聽說扁舟去吳會料應歸  
看早秋雲

丁丑余覓一抄書人或薦黃生名之紀號星岩者入甚

朴野偶過其案頭得句云破菴僧賣臨街瓦獨井人爭  
向晚泉余大奇之卽餉米五斗自此欣然大用力于詩  
五言句云雲開日脚直雨落水紋圓竹鏡穿泥壁蠅酣  
落酒尊釣久知魚性樵多識樹名筆殘蘆並用墨盡指  
同磨七言云小牕近水寒偏覺古木遮天暉不知舊生  
萍處泥猶綠新落花時水亦香舊甃恐閒都貯水破墻  
難補盡糊詩有簾當檻雲仍入無客推門風自開

曾南村好吟詩作山西平定州刺史倣白香山將詩集  
分置聖善東林故事乃將上黨咏古諸作命門人李珍  
聘書藏文昌祠中身故十餘年陶悔軒來牧此州過祠



拈香見此藏本既愛詩之清妙而又自憐同爲山左人  
乃序而梓之并附已作于後曾過盤石關云盤石關前  
石路微離離黃葉小村稀斜陽忽送奇峯影千疊層雲  
屋上飛陶咏遺詩軒云一代文章擅逸才開軒吟罷興  
悠哉官閒且喜能醫俗爲與詩人坐臥來陶又咏嘉山  
書院云新開藝苑育羣英文學風傳古艾城借得公餘  
無俗累攜朋來聽讀書聲

吳門名醫薛雪自號一瓢性孤傲公卿延之不肯往而  
予有疾則不招自至乙亥春余在蘇州庖人王小余病  
瘦不起將掩棺而君來天已晚燒燭照之笑曰死矣然

吾好與疫鬼鬪恐得勝亦未可知出藥一九搗石菖蒲  
汁調和命輿夫有力者用鐵箸鏤其齒灌之小余目閉  
氣絕喉汨汨然似咽似吐薛囑曰好遣人視之雞鳴時  
富有聲已而果然再服二劑而病起乙酉冬余又往蘇  
州有厨人張慶者得狂易之病認日光爲雪暎少許腸  
痛欲裂諸醫不效薛至袖手向張臉上下視曰此冷痧  
也一刮而愈不必診脉如其言身現黑癰如掌大亦卽  
霍然余竒賞之先生曰我之醫卽君之詩純以神行所  
謂人居屋中我來天外是也然先生詩亦正不凡如夜  
別汪山樵云客中憐客去燒燭送歸櫓把手各無語寒

江正落潮異鄉難跋涉舊業有漁樵切莫依人慣家貧  
子尚嬌嘲陶令云又向門前栽五柳風來依舊折腰枝  
咏漢高云恰笑手提三尺劍斬蛇容易割雞難偶成云  
窗添墨譜搖新竹几印連環按覆孟

張文敏公以書法掩詩名余見手書春鶯囀云綢壓香  
筒墜宿雪花魂愁殺月如銀獨聽魚鑰西風冷又是深  
秋一夜人

方敏恪公勲位隆赫而詩情極佳未第時途中看花三  
絕云數枝紅艷困輕塵隴後風前別有春袖底飛英吹  
特地似憐驢背有詩人女兒裝罷髻鬟垂底桃花一

面酣結伴前村攜手去每逢花處又重簪稽首茅菴古  
白華道旁人嶽道旁花慈雲座下無多願每到花時堪  
在家

已卯夏蔣秦樹中翰偶過金陵篋中藏海寧許衡紫名  
燦者詩一卷湖上云秋思動孤往凌波遂渺然湖雲多  
上樹山雨忽如烟白鷺來菱外紅蕖落檻前淡粧西子  
笑風急莫回舡作河西雜詩有明七子氣魄如龍沙掃  
雪秋馳馬免魄凝霜夜炤旗邊下日課屯田麥使者星  
馳屬國瓜皆極雄健又絕句云鐵馬寒風日日秋  
獵獵卷嵐尤何緣身作平安火一夜東還過蕭州余慕

其人徧訪卅年卒無知者

丙辰秋召試者同領月俸于戶部同鄉程卿渠指一人  
笑曰此吾家娘子秀才也入學時初名默寓居金陵工  
詩今遁而窮經改名廷祚別字綿莊以其閒靜修潔故  
號程娘子因與數言而別讀其海淀園林一絕云隔岸  
迢遙御路明林間倒影見人行朝天多少朱輪過添入  
山泉作水聲京中憶女云三齡幼女縈離夢一自能言  
未得看戲罷頗聞知記憶書來漸解問平安慰情欲比  
真男子努力應加遠客餐席笑更教聽隔舍茫茫愁思  
到更闌武林懷古云一自休兵國怨除君王酣醉九重

居雲開鳳嶺笙歌滿夢冷龍城驛使疎海日忽驚宮漏  
盡春潮猶笑將壇虛誰知立馬吳山客不惜千金買諫  
書詩甚綿麗不作經生語後蘇撫雅公薦先生經學卒  
報罷年七十七無子而卒著書盈尺俱付隨園

乙亥秋余弔於綿莊家綿莊指一少年告我曰此嚴冬  
友秀才也年未弱冠前日學使問笙詩有聲無辭生條  
舉十六家之說以辨其非余心敬之已而見過以秀容  
小草相示晚眺云別院鳴鐘鼓登樓報晚晴一山清有  
待千樹暖無聲漸得東風信彌傷旅客情滄洲明發早  
應負好春生舟次仇湖云際天雙岸失出霧一帆輕

通州保井公工填詞自號四鄉主人蓋言睡鄉醉鄉溫  
柔鄉白雲鄉也咏崔鶯鶯一闕甚佳末二句云交相補  
過還他一嫁癸酉秋見訪隨園相得甚懽別三十年余  
遊狼山井公久亡矣其子欵接甚殷壁上糊余手札數  
行視之乃遊客某所假也然已厚贖之矣其兩代之好  
賢若此

陝州鞏洛間人多鑿土而居余自西秦歸過雨住窑中  
三日吟詩未成後二十年年家子沈孝廉琨有過陝  
一聯云人家半鑿山腰住車馬都從屋上過直是代子  
作也又過高淳湖云涼生宿鷺眠初穩風靜遊魚聽有

聲

宋維藩字瑞屏落魄揚州盧雅雨爲轉運未知其才拒  
而不見余爲代呈曉行云客程無宴起破曉跨驢行殘  
月忽墮水村雞初有聲市橋霜漸滑野店火微明不少  
幽居者高眠夢不驚盧喜贈以行資蘇州浦翔春曉行  
云早出弇山口秋風襖被輕背人殘月落何處曉雞聲  
客久影俱瘦宵闌氣更清行行遠樹裏紅日自東生二  
人不相識而二詩相似且同用八庚韻亦奇浦更有佳  
句云舊塔未傾流水抱孤峯欲倒亂雲扶又醉後不知  
歸路晚玉人扶著上花驄



杭州宴會俗尚盲女彈詞予雅不喜以爲女之首重者  
目也清臚不盼神采先無有王三姑者雅好文墨對答  
名流人人如其意之所出王夢樓侍講作七古一章中  
有八句云成君浮磬子登璫金醴尊經侍玉霄謫降道  
緣猶未減不將青眼看塵囂紈質由來兼黠慧傳神豈  
待秋波媚輕雲冉冉月宜遮香霧濛濛花愛睡杭蘆浦  
贈詩云曉粧梳掠逐時新巧笑生春又善輦道客勝常  
知客姓目中莫謂竟無人檀槽圓股曉生寒也學曹剛  
左手彈衆裏自嫌衰太甚幸無老態被卿看

乾隆戊寅廬雅雨轉運揚州一時名士趨之如雲其時

劉映榆侍講掌教書院生徒則王夢樓金棕亭鮑雅堂  
王少陵嚴冬友諸人俱極東南之選聞余到各捐餽廩  
延飲于小全園不數年盡入青雲矣鮑見贈玉堂仙人  
篇不及省記僅記夢樓偕全公魁使琉球二首云一行  
金埒響瓊琚公子羣過水竹居非髮也須千萬值綺年  
多是十三餘將離更唱紅蘭曲相憶應看青李書鸚鵡  
香醪斟酌遍不知涼月透交疏那霸清江接海門每隨  
殘照望中原東風未與歸舟便北里空銷旅客魂盡夜  
華燈舞鵲鴝三秋荒島狎鯨鯢他時若話悲歡事衣上  
濤痕並酒痕余按琉球國王貴戚子弟皆傳脂粉錦衣

玉貌能歌以敬 天使故移尊度曲汪舟次先生集中  
所咏與夢樓同

有某太史以哭父詩見示余規之曰哭父非詩題也禮  
大功廢業而況于斬衰乎古人在喪服中三年不作詩  
何也詩乃有韻之文在衰喪時何暇揮毫拈韻況父母  
恩如天地試問古人可有咏天地者乎六朝劉晝賦六  
合一時有疥駱駝之譏歷數漢唐名家無哭父詩非不  
孝也非皆生于空桑者也三百篇有蓼莪古序以爲刺  
幽王作有陟岵陟屺其人之父母生時作惟晉傅咸采  
又文山有小祥哭母詩母與父似畧有間到小祥哀亦

暑減然哭二親終不可爲訓

常州莊孫熊太史冬日詩云磨來凍墨無濃色典後朝  
衣有皺痕揚州程午橋太史贈唐改堂前輩云春生秋  
扇隨新令霉久朝衣檢舊斑

常州顧文煒有苦吟一聯云不知功到處但覺誦來安  
又云爲求一字穩耐得半宵寒深得作詩甘苦

人畏冷臥必彎身高翰起司馬宿明港驛云燈昏妨睡  
頻移背衾薄愁寒屢曲腰野行者嘗見牛背上負羣鳥  
而行魯星村云春田牛背鳩爭落野店牆頭花亂開紅  
小者人不能起立程魚門云別開新樣殊堪哂跪着衣

裳臥讀書

黃星岩隨園偶成云山如屏立當窗見路似蛇旋隔竹  
看鴈樊榭咏崇先寺云花明正要微陰襯路轉多從隔  
竹看二人不謀而合然黃不如鴈者以如字與似字犯  
重竹垞爲放翁摘出百餘句後人當以爲戒

戊戌九月余寓吳中有嘉禾少年吳君文溥來訪袖中  
出詩稿見示云將就陝西畢撫軍之聘勿勿別去予讀  
其詩深喜吾浙後起有人而嘆畢公之能憐才也錄其  
遊孤山云春風欲來山已知山南梅萼先破枝高人去  
後春草草萬古孤山迹如掃巢居閣畔酒可沽幸有我

來山未孤笑問梅花肯妻我我將抱鶴家西湖其他佳  
句如不知新月上疑是水沾衣底事春風欠公道兒家  
門巷落花多深得唐人風味

巢縣湯郎中名樵綢性高淡如其吟咏早起云老杏着  
東風紅芳幾回變何必遠尋春日日牆頭見昨夜雨無  
聲地上青苔徧早起快登樓釣簾進雙燕他如溪清山  
影入風動竹陰移遊山心在山合眼飛嵐繞真得靜中  
三昧者其子擴祖能詩有父風過隨園見訪不值寄詩  
云花含宿雨柳含烟隱士園林別有天高臥白雲人不  
見一家雞犬翠微巔

杭州符郎中名曾字幼魯詩主高淡嵇相國爲余誦其  
三日不來秋滿地蟲聲如雨落空山一聯余同召試記  
其齋宮云寒雲添暝色老屋聚秋聲咏唐花云當時不  
藉吹噓力少待陽和也自開哭揚州馬秋玉云心死使  
爲大自在魂歸仍返小玲瓏小玲瓏山館者馬氏花園  
也屬對甚巧賀周石帆學士納妾云藥爐經卷都拋却  
只向燈前喚夜深尤蘊藉

吳中七子有趙損之而無張少華二人交好忽中道不  
終都向余嘖嘖有言而余亦不能爲兩家騎驛也未十  
年張一第而卒趙亦殉難金川史彌遠云早知泡影須

史事海把恩仇抵死分信哉少華蘇堤三首云拍隄新  
漲碧于羅隄上遊人連臂歌笑指紛紛水楊柳那枝眠  
起得春多碧琉璃淨夜雲輕簫管無聲露氣清好是柳  
陰花影裏月華如水踏莎行沙棠銜尾按箏琶隣舫停  
檣靜不譁雲母牕中雙髻影亭亭低映小紅紗消夏云  
水卮不辭茶七碗火攻愁對燭三條

王道士至惇有句云東風大是無知物吹老春光晝轉  
長黃星岩有句云飯餘一睡都成例五月何曾覺晝長  
陳古漁有句云靜坐晴冬晝亦長三押長字俱妙

朱草衣哭槎兒云羅浮南海歷秋冬烟水雲山隔萬重



前日寄書書面上紅簽猶寫汝開封洪鑾贈徐小鵬云  
早離講席賦離居知己逢難別易疎正是開門逢去使  
接君三月十三書嚴冬友憶女云料得此時依母坐看  
封書札寄長安三詩人傳誦以爲天籟不知藍本皆出  
於王次回其過婦家感舊云歸寧去日淚痕濃鎖却粧  
樓第二重空剩一行遺墨在丙寅三月十三封

余挂冠四十年久不閱縉紳偶有送者擷之都非相識  
偶讀趙秋谷題縉紳云無復堪容位置處漸多不識姓  
名人爲之一笑先生康熙己未翰林至乾隆己未而身  
猶強健惟兩目不能見物與余爲先後同年相傳所著

譚龍錄痛詆阮亭余索觀之亦無甚抵牾悟先生名執信以國忌日演戲被劾故有句云可憐一曲長生殿直悞功名到白頭

祝太史芷塘以詩集見示予小獻芻蕘太史深爲嘉納別後從京師寄懷云蓋世才名大遊仙福量深江河不廢業松柏後凋心酌兕祈難老將雛得好音平生行樂處古少莫論今孤踪淹丙舍公亦返鄉間一見笑談劇廿年傾倒餘定文丁敬禮賦海木元虛何日秦淮曲相逢重起予

咏古詩有寄托固妙亦須讀者知其所寄託之意而后

覺其詩之佳盧雅雨先生長不滿三尺人呼矮盧故題  
李廣廟云明禪自有千秋貌不在封侯骨相中薛皆三  
進士門生甚少題桃源詩云桃花不相拒源路自家尋  
余起病補官年未四十題邯鄲廟云黃梁未熟天還早  
此夢何妨再一回

從古權貴在朝未有能和協者宋人登山詩云直到天  
門最高處不能容物只容身唐人閨情云若非形與影  
未必肯相容宮詞云聞有美人新進入六宮無語一齊  
愁又曰三千宮女如花貌幾個春來沒淚痕皆可謂說  
盡世情

人有滿腔書卷無處張皇當爲考据之學自成一家其次則駢體文儘可鋪排何必借詩爲賣弄自三百篇至今日凡詩之傳者都是性靈不關堆垛惟李義山詩稍多典故然皆用才情驅使不專砌填也余續司空表聖詩品第三首便曰博習言詩之必根于學所謂不從糟粕安得精英是也近見作詩者全仗糟粕瑣碎零星如剃僧髮如拆藕線句句加註是將詩當考据作矣慮吾說之害之也故續元遺山論詩末一首云天涯有客號吟癡誤把抄書當作詩抄到鍾嶸詩品日該他知道性靈時

宋人論詩多不可解楊蟠金山詩云天末樓臺橫北固  
夜深燈火見揚州的是金山不可移易而王平甫以爲  
是牙人量地界詩嚴維柳塘春水慢花塢夕陽遲的是  
靜境無人道破而劉貢父以爲春水慢不須柳塢孟東  
野咏吹角云似開孤月口能說落星心月不聞生口星  
忽然有心穿鑿極矣而東坡贊爲奇妙皆所謂好惡拂  
人之性也

余素慕山左高鳳翰之名不得一見初之村太守爲誦  
其送人一首云君胡爲者昨日來青燈綠酒歡無涯君  
胡爲者今日去挽斷征鞭留不住君來君去總傷神不

如悠悠陌路人高字南阜晚年病臂以左手作書廬雅  
而哭之云再散千金仍托鉢已殘一臂尚臨池高珍藏  
衛青印一方臨終贈陝中劉介石刺史斗紐方寸篆法  
雖佳而玉已經火炙余見之頗不當意按明史亦有衛  
青此印未必便是漢大將軍之物

蘇州袁秀才鉞自號青溪先生娛宋儒之學著書數千  
言專駁朱子人以怪物目之年八十餘猶生子善醫工  
書詩多自適不落古人家數明覺寺題壁云燈火熒熒  
滿法堂僧家愛靜却偏忙亦知世上逍遙客踏月吟詩  
到上方夏日寫懷云風過靜聽松子落雨餘閒數藥苗

抽冬暖云似閔敝裘留質庫爲開簿霧送朝暾頗見性情青溪解唯求則非邦也與惟赤則非邦也與皆夫子之言非曾點問也人以爲怪不知論語何晏古註原本作此解宋王旦怒試者解當仁不讓于師師字作衆字解以爲悖古不知說本賈逵並非杜撰少所見之人以不怪爲怪

元遺山譏秦少游云有情芍藥含春淚無力薔薇臥晚枝拈出昌黎山石句方知渠是女郎詩此論大謬芍藥薔薇原近女郎不近山石二者不可相提而並論詩題各有境界各有宜稱杜少陵詩光燄萬丈然而香霧雲

鬟濕清輝玉臂寒分飛蛺蝶原相逐並蒂芙蓉本是雙  
韓退之詩橫空盤硬語然銀燭未銷窻送曙金釵半醉  
坐添春又何嘗不是女郎詩耶東山詩其新孔嘉其舊  
如之何周公大聖人亦且善謔

抱韓杜以凌人而粗脚笨手者謂之權門托足倣王孟  
以矜高而半吞半吐者謂之貧賤驕人開口言盛唐及  
好用古人韻者謂之木仙演戲故意走宋人冷徑者謂  
之乞兒搬家好疊韻次韻刺刺不休者謂之村婆絮談  
一字一句自註來歷者謂之骨董開店

余咏春草一時和者甚多獨徐緒和人字韻云踏青渺



渺前無路埋玉深深下有人余爲嘆絕其他則周青原  
云拾翠暗遺金鈿小踏青微礙繡裙低嚴冬友云坐來  
小苑同千里夢去朱門又一年龔元超云春回地上人  
難測綠到門前柳未知李叅將烟云曠野有人知醉醒  
荒園無主自高低諸作雖佳皆不如徐之沉着也惟  
程魚門有長共春來不共歸七字殊覺大方惜忘其全  
首

作古體詩極遲不過兩日可得佳構作近體詩或竟十  
日不成一首何也蓋古體地位寬餘可使才氣卷軸而  
近體之妙須不着一字自得風流天籟不來人力亦無

如何今人動輕近體而重古風蓋於此道未得甘苦者也葉庶子書山曰子言固然然人功未極則天籟亦無因而至雖云天籟亦須從人功求之知言哉

詩人家數甚多不可硜硜然域一先生之言自以爲是而妄薄前人須知王孟清幽豈可施諸邊塞杜韓排冪未便播之管絃沈宋莊重到山野則俗盧同險怪登廟堂則野韋柳雋逸不宜長篇蘇黃瘦硬短於言情悱惻芬芳非溫李冬郎不可屬詞比事非元白梅村不可古人各成一家業已傳名而去後人不得不兼綜條貫相題行事雖才力筆性各有所宜未容勉強然寧藏拙而

不爲則可若護其所短而反譏人之所長則不可所謂  
以宮笑角以白詆青者謂之陋儒范蔚宗云人識同體  
之善而忘異量之美此大病也蔣茗生太史題隨園集  
云古來只此筆數枝怪哉公以一手持余雖不能當此  
言而私心竊向往之

古人門戶雖各自標新亦各有所祖述如玉臺新咏溫  
李西崑得力於風者也李杜排奭得力于雅者也韓孟  
奇力於頌者也李賀盧仝之險怪得力于離騷天  
問大招者也元白七古長篇得力于初唐四子而四子  
又得之于黃子山及孔雀東南飛諸樂府者也今人一

見文字艱險慎以爲文體不正不知載鬼一車上帝板板已見于毛詩周易矣

詩宜朴不宜巧然必須大巧之朴詩宜澹不宜濃然必須濃後之澹譬如大貴人功成宦就散髮解簪便是名士風流若少年紈袴遲爲此態便當答責富家雕金琢玉別有規模然後竹几簾床非村夫貧相

牡丹詩最難出色唐人國色朝酣酒天香夜染衣之句不如嫩畏人看損嬌疑日炙消之寫神也其他如應爲價高人不問恰綠香甚蝶難親別有寄託買栽池館疑無地看到子孫能幾家別有感慨宋人云要看一見春

風面俗矣 本朝沙斗初云艷艷嚴粧常目重明明薄  
醉要人扶裴春臺云一欄并力作春色百卉甘心奉盛  
名羅江邨云未必美人多富貴斷無仙子不樓臺胡穉  
威云非徒冠冕三春色真使能移一世心程魚門云能  
教北地成香界不負東風是此花此數聯足與古人頡  
頏元人貶牡丹詩云棗花似小能成實桑葉雖麤解作  
絲惟有牧丹如斗大不成一事又空枝晁無咎並頭牡  
丹云月下故應相伴語風前各自一般愁

詩以比興爲佳王孟亭箴輿守懷慶時與盧中丞焯同  
寅王被劾罷官二十年後盧爲浙江巡撫王往見之盧

相待甚優許其薦舉而王自傷老矣不欲再談往事西湖小集詩云再移畫舫春應老重撥朱絃恨轉生

江陰翁明經照字朗夫館嵇相國家相公非朗夫倡和不吟詩人呼爲詩媒雍正乙卯以鴻博薦朗夫謝詩云此身得遇裴中令不向香山老一生一時傳誦朗夫有春柳云千里因依惟夜月一生消受是東風迎來挑葉如相識猜得楊枝是小名皆佳句也平生有謙辭拜起紆遲年登八十猶熏衣飾貌寸髭不留余初相見知其多禮乃先跪叩頭逾時不起先生愕然余告人曰今日謙過朗夫矣

李嘯村虎邱竹枝詞已極新艷而楊次也先生西湖竹  
枝乃更過之李云橫塘七里路西東侍女如雲踏軟紅  
才到寺門歡喜地一時花下筍輿空仰蘇樓畔石梯懸  
步步弓鞋劇可憐五十三參心暗數欹斜扶遍阿娘肩  
佛座燒香一瓣新慈雲低覆落花塵不妨訴盡癡兒女  
那有如來更笑人女冠裝裹認依稀只少穿珠百人圍  
豈是閨人真好道阿儂愛著水田衣楊云自翻黃歷揀  
良辰幾日前頭約比鄰郎自乞晴儂乞雨要他微雨散  
閒人斟酌衣裳稱體難回時暄熱去時寒侍兒會得人  
心意半臂輕綿隔夜安乍晴時節好天光紈綺風來撲

地看花點胭脂山潑黛西湖今日也濃粧烏油小轎兩  
肩扶紕縵窗紗有若無裏面看人原了了不知人看可  
糝糊時樣梳妝出意新鄂王墳上小逡巡擡頭一笑匆  
匆去不避生人避熟人遊人魚貫各分行就裏妍媸畧  
自量老婢當頭娘頭尾垂髻嬌女在中央珠翠叢中逞  
別才時新衣服稱身裁誰知百裯羅裙上也畫西湖十  
景來白石敲光細火紅繡襟私貯小金筒口中吹出如  
蘭氣僥倖何人在下風苔陰小立按雙鬟貼地弓鞋一  
寸彎行轉長堤無氣力累人攬着上孤山白舫青尊扶  
妓遊語音輕脆認蘇州明知此地湖山勝偏要違心



虎邱悄密行踪自戒嚴朱簾轎子綠垂簷輕風畢竟難  
防備故揀人叢揭轎簾朋儕遊興暮相同裏外湖橋宛  
轉通靚面幾番成一笑剛才分路又相逢畫舫人歸一  
字排半奩春水淨如揩斜陽獨上長堤立拾得花間小  
鳳釵黃莘田先生虎邱竹枝云昏崖老樹落朱簾漏出  
紅紗隔葉燈不畏霓裳有風露吹笙樓上坐三層斑竹  
薰籠有舊恩湘妃節節長情根吳娘酷愛衣香好個個  
將錢買淚痕于點琉璃八角亭劒池寒水浸華星天生  
一片笙歌石留與千人廣坐聽畫鼓紅牙節拍繁崑山  
法部鬪新翻順郎年少何裁老海燕亭前較一番樓前

玉杵擣紅牙簾下銀燈索點茶十五當壚年少女四更  
猶插滿頭花湘簾畫楫趁新涼衣帶盈盈隔水香好是  
一行烏柏樹慣遮珠舫坐秋娘又西湖竹枝云畫羅紈  
扇總如雲細草新泥簇蝶裙孤憤何關兒女事踏青爭  
上岳王墳梨花無主草堂青金縷歌殘翠黛凝魂斷蕭  
蕭松柏路滿天梅雨下西陵三人竹枝皆冠絕一時  
又程太史午橋虹橋竹枝云青溪碧草兩悠悠酒地花  
場易惹愁月暗玉鉤人散後冷螢飛上十三樓米家舫  
子只琴書秋水新添二尺餘一帶管絃歸棹晚橋邊簾  
幙上燈初避人爭喚酒家船兒女心情更可憐未出水

開三四里家家開閤整花鈿不厭朝陰愛曉晴園林相  
倚百花生梨紅杏白休輕喚簾底防人認小名法海橋  
頭酒半闌水嬉烟火盡餘歡笑他避客雙環女一半舉  
簾側髻看

岳大將軍鍾琪爲一代名將容狀奇偉食飲兼人而工  
於吟詩丙辰赦歸後種茶於四川之百花洲尹文端公  
贈詩云他日玉書傳詔日江天何處覓漁翁未幾王師  
征金川果復起用過邯鄲題壁云只因未了塵寰事又  
作封侯夢一場周蘭坡學士祭告西岳所過僧壁山岩  
見題詩甚佳字亦奇古欵落容齋不知卽岳公也

明將軍瑞殉節緬甸 賜諡忠烈王干吟詩雨中過石  
門云自憐馬上囊韉客獨立溪邊問渡船元夜歸省云  
陌上晚烟飛素練渡頭殘雪踏銀沙送弟瑤林使烏斯  
藏云寒分百戰袍渴共一刀血皆名句也弟明義字我  
齋詩尤嫺雅其醉後聽歌云官柳蕭蕭石路平歡場回  
首隔重城可憐騎馬情如我步步徘徊不肯行涼風吹  
面酒初醒馬上敲詩鞭未停寄語金吾城慢閉夢魂還  
要再來聽又偶成云東風不解瞞人度才入竹來便有  
聲早起云平明鐘鼓嚴寒夜不負香衾有幾人

將軍三娶名媛皆見逐干姑有放翁之恨最後娶都統

常公季女伉儷甚篤征緬時夫人送行詩有但願同凋並蒂蓮之句公果死節而夫人亦自縊

京師故事凡縉紳陪弔于喪家者聞前輩至則易吉服相見然有易有不易者以來客之未必皆前輩也余陪弔于座主甘大司馬家忽聞徐蝶園相公來則滿堂盡吉服矣公名元夢康熙癸丑進士與韓慕廬同年滿朝公卿皆其後輩時年九十餘短身赤鼻面少鬚髯詩宗盛唐送人出塞云君到居庸北應憐一雁回沙平疑地盡山豁訝天開落日重關閉秋風萬馬來勉旃從此役莫上望鄉臺大學士舒公赫德其孫也

蘇州逸園離城七十里在西磧山下面臨太湖古梅百  
株環繞左右溪流潺潺渡以石橋登騰嘯臺望飄渺諸  
峯有天際真人想主人程鍾字在山隱士也妻號生香  
居士夫婦能詩有絕句云高樓鎮日無人到只有山妻  
問字來可想見一門風雅予探梅鄧尉往訪不值次日  
程君入城作答翦眉清古勸續前遊而予匆匆解纜逾  
年再至蘇州程君已爲異物記其雜咏一首云樵者本  
在山山深沒樵徑不見採樵人樵聲谷中應

詩家活對最妙宋人贈某云每憐民若子還喜稻成孫  
真山民咏杜鵑云歸心千古終難白啼血萬山都是紅

華亭李進哭友云誄詞作自先生婦遺稿歸于後死朋  
王介社咏牡丹云相公自進姚黃種妃子偏吟李白詩  
李穆堂賀安溪相公生子云其間原必有幾日辨之無  
沈椒園登陶然亭云每來此地皆重九有約同遊至再  
三胡宗緒祭酒贈友云兩人拍手齊大笑一路同行到  
小姑皆活對也

揚州爲鹽賈所居風尚侈靡崔尚書應階詩云青山也  
厭揚州俗多少峯巒不過江鄭板橋詩云千家生女先  
教曲十里栽花當種田

常熟陳見復先生爲海內經師而詩極風韻悼亡云出

門交寡入門求晤語居然近上流寂寞於陵停織屨他  
時誰與謚黔婁何必他生訂會期相逢卽在夢來時烏  
啼月落人何處又是一番新別離中進士不殿試而歸  
曰馬力健知遊翼北櫓聲柔覺到江南題名浪逐看花  
伴去國還同落第人

錢稼軒司寇之女名孟鈿家崔進士龍見爲富平令嚴  
侍讀從長安歸夫人厚贈之嚴問至江南帶何物奉酬  
曰無他求只望寄袁太史詩集一部其風雅如此因誦  
其五言云啼鳥空繞樹殘夢只隨鐘有浣青集行世其  
號浣青者欲兼浣花青蓮而一之也夫人通音律常在



秋帆中丞座上聽客鼓琴曰角聲多宮聲少且多殺伐之音何也問客果從塞外軍中來余庚申夏乘舟北上遇稼軒南歸時未中狀元也見其手抱幼女才周晬今四十八年矣在杭州見夫人談及此事夫人笑云所抱者卽年姪女也余故題其詩冊有云而翁南下賦歸歟值我新婚北上初水面匆匆通數語懷中正抱女相如詩有有篇無句者通首清老一氣渾成恰無佳句令人傳誦有有句無篇者一首之中非無可傳之句而通體不稱難入作家之選二者一欠天分一欠工夫必也有篇有句方稱名手

杭州布衣吳頴芳字西林博學多聞嘗自序其詩曰古  
人讀書不專務詞章偶爾流露謳吟僅抒所蓄之一二  
其胸中所貯淵乎其莫測也遽降而下傾瀉漸多逮至  
元明以十分之學作十分之詩無餘蘊矣次焉者或溢  
其量以出故其經營之處時露不足如舉重械雖同一  
運用而勞逸之態各殊古人勝乎近代可準是以觀予  
嘗試武童見有開弓至十石而色變手戰者曉之曰汝  
務十石之名而醜態盡露何若用五石六石之從容大  
方乎頗與吳言相合

西林與杭厲諸公同時角逐及諸公俱登科第而西林

如故也故咏笋腊結句云回頭看同隊一一上雲烟又  
荅客主曰田間佳却攜鋤手來與諸公話白雲

詩須善學暗偷其意而顯易其詞如毛詩嗟我懷人置  
彼周行唐人學之云提籠忘采葉昨夜夢漁陽是也唐  
人詩云憶得去年春風至中庭桃李映瑣牕美人挾瑟  
對芳樹玉顏亭亭與花雙今年花開如舊時去年美人  
不在茲借問離居恨深淺只應獨有庭花知宋人學之  
云去年除夕歸自北行李到門天已黑今年除夕客南  
方雪滿關山歸不得老妻望我眼將穿只道今年似去  
年古樹夕陽鴉影亂猶同小女立門前

白香山詩云周公恐懼流言日王莽謙恭下士時若使  
當時身早死兩人真偽有誰知米人反其意曰少年踰  
下安無忤老父圯邊悞不平人物若非觀歲暮淮陰何  
必滅文成

毘陵王荏山明府女玉瑛字采薇嫁孫星衍秀才伉儷  
甚篤年二十四而夭秀才求予志墓其舟過丹徒云幽  
行已百里村落半柴扉隻鳥時依樹孤螢不上衣月高  
人影小潮定櫓聲稀沿水星星火歸驚宿鷺飛其他佳  
句如戶低交葉暗徑小受花深研墨汚羅袖看魚落翠  
鈿蟲依香影垂簾網蟻怯晨光墮帳紗一院露光圓作

雨四山花影下如潮皆妙絕也秀才後中丁未榜眼采薇竟不及見悲夫

李北海見崔顥投詩曰十五嫁王昌罵曰小兒無禮秦少游見孫莘老投詩曰平康在何處十里帶垂楊孫罵曰小子又賤發二前輩方嚴相似而考其生平均非能作詩者

鎮江布衣李琴夫咏佛手云白業堂前幾樹黃摘來猶似帶新霜自從散得天花後空手歸來總是香咏佛手至此可謂空前絕後矣

余少貧不能買書然好之頗切每過書肆垂涎緝閱苦

價貴不能得夜輒形諸夢寐曾作詩曰孰遠愁過市家  
貧夢買書及作官後購書萬卷翻不暇讀矣有如少時  
牙齒堅強貧不得食衰年珍羞滿前而齒脫腹果不能  
壓飲爲可嘆也偶讀東坡李氏山房藏書記甚言少時  
得書之難後書多而轉無人讀正與此意相同

黃石牧太史言秦禁書禁在民不禁在官故內府博士  
所藏並未亡也自蕭何不取項羽燒阿房而書亡矣年  
家子高樹程咏蕭相云英風猶想入關初相國功勳世  
莫如獨恨未離刀筆吏只收圖籍不收書

揚州轉運使朱子隸工畫能詩王夢樞爲誦其佳句云

一水漲喧人語外萬山青到馬蹄前

老年之詩多簡練者皆由博返約之功如陳年之酒風  
霜之木藥淬之匕首非枯槁簡寂之謂然必須力學苦  
思衰年不倦如南齊之沈麟士年過八旬手寫三千紙  
然後可以壓倒少年

上官儀詩多浮艷以忠獲罪傳元善言兒女之情而剛  
正嫉惡臺閣生風楊子雲自擬周易乃附新莽余申請  
禁採花而後以賍敗席豫一生不作艸書而薦安祿山  
公正無私

余門生談羽儀字毓奇家富而好買書自署一聯曰閉

戶自知精力減貯書還望子孫賢

宋巖有翼詆東坡詩悞以慈爲非以長桑君爲倉公以摸金校尉爲摸金中郎所用典故被其拈摘幾無完膚然七百年來人知有東坡不知有巖有翼

用事加用兵愈多愈難以漢高之雄畧而韓信只許其能用十萬可見部勒驅使談何容易有梁溪少年作懷古詩動輒二百韻子笑曰子獨不見唐人咏蜀葵詩乎其人請誦之曰能共牡丹爭幾許被人嫌處只緣多

某太史掌教金陵戒其門人曰詩須學韓蘇大家一讀溫李便終身入下流矣余笑曰如溫李方是真才力量



還在韓蘇之上太史愕然余曰韓蘇宜皆尚書侍郎力  
足以傳其身後之名溫李皆末僚賤職無門生故吏爲  
之推挽公然名傳至今非其力量尚在韓蘇之上乎且  
學溫李者唐有韓偓宋有劉筠楊億皆忠清鯁亮人也  
一代名臣如寇萊公文潞公趙清獻公皆西崑詩體專  
學溫李者也得謂之下流乎

傳字人旁加專言人專則必傳也堯舜之臣只一事孔  
子之門分四科亦專之謂也唐人五言工不必七言也  
近體工不必古風也宋以後學者好誇多而闕靡善乎  
方望溪云古人竭畢生之力只窮一經後人貪而兼爲

之是以循其流而不能溯其源也

乾隆丙辰 召試博學宏詞海內薦者二百餘人至九月而試保和殿者一百八十人詩題是山鷄舞鏡七排十二韻限山字劉文定公有句云可能對語傾關關上深嘉獎親拔爲第一遂以編修致身宰相二百人中最高者萬九沙先生諱經最少者爲枚全謝山庶常作公車徵士錄以先生居首枚署尾己亥枚還杭州先生之少子名福者持先生小像索詩余題一律有當年丹詔召耆英驥尾龍頭記得清之句詩載集中

明洪紫溪自言三十年讀書才消得胸中狀元二字陋

哉言乎如欲狀元之名副其實則狀元二字胸中不可  
一日忘也如倚狀元爲驕人之具則狀元二字胸中不  
可一日不忘也何待讀書三十年哉味其言紫溪自以  
爲忘正其終身不忘之証同年錢文敏公盧唱第一口  
號云自慚才出劉蕡下獨對春風轉厚顏其胸襟出紫  
溪上矣

鄭夾漈極夸杜征南之註左傳顏師古之註漢書妙在  
不強不知以爲知杜不長於鳥獸蟲魚顏不長於天文  
地理故俱缺之不假他人以警識也余謂作詩亦然青  
蓮少排律少陵少絕句昌黎少近體善藏其短而長乃

愈見

大雅文王在上毛傳稱文王受命而作然則文王生而  
諡文乎自以爲於昭于天平鄭箋平王之孫爲平正之  
王成王不敢康爲成此王功不敢自安逸不顯成康亦  
解爲成安祖者之道皆捨先王之諡法而逞其穿鑿之  
臆說朱子駁而正之是矣

顧寧人曰夫其巧於和人者其胸中本無詩而拙于自  
言者也又曰舍近今恒用之字而借古字之通用以相  
矜者此文人之所以自文其陋也

人悅西施不悅西施之影明七子之孝唐是西施之影

也

臯陶作歌禹稷無聞周召作詩太公無聞子夏子貢可與言詩顏閔無聞人亦何必勉強作詩哉

宋史嘉祐間朝廷頒陣圖以賜邊將王德用諫曰兵機無常而陣圖一定若泥古法以用今兵慮有僨事者技術傳錢乙善醫不守古方時時度越之而卒與法會此二條皆可悟作詩文之道

崔念陵進士詩才極佳惜有五古一篇實關公華容道上放曹操一事此小說演義語也何可入詩何此瞻作札有生瑜生亮之語被毛西河誚其無稽終身歎悔某

孝廉作關廟對聯竟有用秉燭達旦者俚俗乃爾人可不學耶

宋曾致堯謂李虛已曰子時雖工而音韻猶啞愛日齋詩話曰歐公詩如閨中嬋婦終身不見華飾味此二語當知音韻風華固不可少

某太史自夸其詩不巧而拙不華而朴不脆而澁余笑謂曰先生聞樂喜金絲乎喜玉缶乎入市買錦繡乎買麻桌乎太史不能答